

四庫全書

史部

欽定四庫全書

史部

舊五代史卷七十六至七十九

詳校官編修臣黃壽齡

洗馬臣王坦修覆勘

總校官編修臣朱鈐

校對官中書臣吳翼成

謄錄監生臣譚湘鏡

欽定四庫全書

舊五代史卷七十六

宋門下侍郎參知政事監修國史薛居正等撰

晉書第二

高祖紀二

天福元年十一月己亥帝御北京崇元殿降制改長興  
七年爲天福元年大赦天下十一月九日昧爽已前應  
在京及諸州諸色罪犯及曾授僞命職掌官吏并見禁

囚徒已結正未結正已發覺未發覺罪無輕重常赦不  
原者咸赦除之應明宗朝所行質命法制仰所在遵行  
不得改易其在京鹽貨元是官場出糴自今後竝不禁  
斷一任人戶取便糴易仍下太原府更不得開場糴貨  
其麴每斤與減價錢三十文以節度判官趙瑩爲翰林  
學士承旨守尚書戶部侍郎知河東軍府事以節度掌  
書記桑維翰爲翰林學士守尚書禮部侍郎知樞密院  
事以觀察判官薛融爲吏部郎中兼侍御史知雜事太

原縣令羅周岳爲左諫議大夫節度推官竇貞固爲翰林學士軍城都巡檢使劉知遠爲侍衛馬軍都指揮使客將景延廣爲步軍都指揮使太原少尹李玘爲尚書工部侍郎閏十一月甲子晉安寨副招討使楊光遠等殺上將張敬達以諸軍來降丙寅制以翰林學士承旨知河東軍府戶部侍郎知制誥趙瑩爲門下侍郎同中書門下平章事監修國史以翰林學士權知樞密事禮部侍郎知制誥桑維翰爲中書侍郎同中書門下平章

事集賢殿大學士依前知樞密院事竝賜推忠興運致  
理功臣甲戌車駕至昭義受趙德鈞延壽降是日戎王  
舉酒言于帝曰予遠來赴義大事已成皇帝須赴京都  
今令大詳袞勒兵相送至河梁要過河者任意多少予  
亦且在此州俟京洛平定便當北轅執手相泣久不能  
別脫白貂裘以衣帝贈細馬二十匹獸馬一千二百匹  
仍誡曰子子孫孫各無相忘已卯至河陽北節度使裴  
從簡來降舟楫已具庚辰望見洛陽煙火相次有將校

飛狀請進辛巳唐末帝聚其族與親將審宋虔等登玄  
武樓縱火自焚而死至晚車駕入洛唐兵解甲而罪皆  
慰而舍之帝止潛龍舊地百官稍稍見焉詔御史府促  
朝官入見詔文武兩班臣僚應事偽廷者竝釋罪是日  
百辟謝恩于宮門之外甲申車駕入內御文明殿受朝  
賀周唐禮樂制大赦天下應中外諸色職掌官吏內曾  
有受僞命者一切不問僞廷賊臣張延朗劉延皓劉延  
朗等竝姦邪害物貪猥弄權罪旣滿盈理難容貸除此

三人已行敕命指揮外其有宰臣馬胤孫樞密使房曷  
宣徽使李專美河府節度使韓昭胤等四人並令釋放  
少帝宜令中書門下追尊定諡擇日禮葬妃孔氏宜行  
追冊祔葬應天下節度使刺史下賓席郡職及將校等  
委中書門下各與改轉官資其北文管內鹽鐺戶合納  
逐年鹽利昨者僞命指揮每斗須令人戶折納白米一  
斗五升極知百姓艱苦自今後宜令人戶以元納石鹽  
石斗數目每斗依時價計定錢數取人戶便穩折納斛



斗其洛京管內逐年所配人戶食鹽起來年每斤特與減價錢十文應諸道商稅仰逐處將省司合收稅條例勝于本院前榜內該設名目者即得收稅十二月乙酉幸河陽餞送大詳袞蕃部兵士歸國詔降末帝爲庶人丁亥制以司空馮道守本官兼門下侍郎平章事弘文館大學士以步軍都指揮使符彥饒爲滑州節度使以河陽節度使萇從簡爲許州節度使以澤州刺史劉凝爲華州節度使以皇子重乂爲河南尹庚寅以滑州

節度判官石光贊爲宗正卿辛卯以舊相姚顗爲刑部  
尚書時自秋不雨經冬無雪命羣官徧加祈禱癸巳以  
邠州節度使張希崇爲靈武節度使鄧州節度使皇使  
遇爲定州節度使詔國朝文物制度起居入閣宜依唐  
明宗朝事例施行鎮州衙內都虞候祕瓊作亂逐副使  
李彥琦殺都指揮使胡章同州小校門鐸殺節度使楊  
漢賓燒劫州城丙申帝爲明宗皇后曹氏薨舉哀長春  
殿于輟朝三日詔封故東丹王李贊華爲燕王遣前單

州刺史李肅部署歸葬本國以右拾遺吳涓爲左補闕  
充樞密院學士己亥以汴州節度使李周充西京留守  
以前河中節度使李從璋爲鄧州節度使磁州奏草寇  
攻城三日而退庚子帝爲皇弟故彰聖指揮使敬殷沂  
州指揮使敬德檢校太子賓客敬友舉哀于長春殿以  
舊相盧文紀爲吏部尚書以皇城使周環爲大將軍充  
三司使以左贊善大夫馬重績爲司天監青州奏節度  
使房知溫卒詔鄆州王建立以所部牙兵往青州安撫

中書門下奏請以來年二月二十八日帝慶誕日爲天和節從之

天福二年春正月甲寅朔帝御文明殿受朝賀仗衛如式乙卯日有蝕之是夜有赤白氣相間如耕墾林竹之狀自亥至丑生北濁過中天明滅不定徧二十八宿徹曙方散丁巳故皇弟敬德敬殷竝贈太傅皇子重裔重進重英竝贈太保右神武統軍康思立卒輟視朝贈太子少師是日詔曰唐莊宗陵名與國諱同宜改爲伊陵

應京畿及諸州縣舊有唐朝諸帝陵并眞源等縣並不  
爲次赤卻以畿甸爲望爲定其逐處縣令不得以陵臺  
結銜考滿日依出選門官例指揮隔任後準格施行例  
其宋州亳州節度使刺史落太清宮使副名額庚申以  
前吏部郎中兼侍御史知雜事王松爲左諫議大夫水  
部郎中王易簡本官制誥知定州奏契丹改幽州爲南  
京中書奏請立宗廟從之以翰林學士工部侍郎和凝  
爲禮部侍郎依前充職詔内外文武臣僚並與加恩皇

基初造示普恩也太子少保致仕華溫琪卒贈太子太保是日詔應朝臣中有藉才特除外任者秩滿無遺闕將來擬官之時在外一任同在朝一任升進其就便自求外職及不是特達選任者不在此限也州上言節度使盧文進殺行軍副使率步下親兵過淮以前天平軍節度使檢校太尉兼侍中王建立爲平盧軍節度使以守司空門下侍郎平章事弘文館大學士馮道兼諸道鹽鐵轉運等使天雄軍節度使兼中書令范延光改封

秦國公加食邑實封鳳翔節度使兼中書令西平王李  
從暉加食邑實封乙丑以端明殿學士禮部侍郎呂琦  
為檢校工部尚書祕書監丙寅改中興殿為天福殿門  
名從之湖南節度使楚王馬希範加食邑實封改賜功  
臣名號前昭義節度使檢校太傅同平章事高行周起  
復右金吾衛大將軍依前昭義軍節度使泰寧軍節度  
使李從溫荆南節度使南平王高從誨歸德軍節度使  
趙在禮竝加食邑實封改功臣名號以端明殿學士戶

部侍郎李崧爲兵部侍郎判戶部以左諫議大夫王松  
判度支魏府范延光奏當管夏津鎮捕賊兵士誤殺卻  
新齊州防禦使祕瓊初延光將萌異志使人潛結于瓊  
諾之及是以瓊背其謀密使精騎殺之由是延光反狀  
明矣以工部侍郎李玘檢校右僕射爲汾州刺史以前  
彰國軍節度使尹暉爲左千牛衛上將軍是日詔曰西  
天中印土摩竭陀舍衛國大菩提寺三藏阿闍梨沙門  
室利縛囉宜賜號弘梵大師庚午涇州節度使李德珣



徐州節度使安彥威秦州節度使康福延州節度使劉  
景巖襄州節度使安從進夏州節度使李彝殷竝加食  
邑實封壬申正衙備禮冊贈故皇弟皇子等丙子故契  
丹人皇王歸葬輟視朝一日改汴州雍丘為杞杞縣避  
廟諱也戊戌以兵部侍郎判戶部寅李崧為中書侍郎同  
中書門下平章事充樞密使以權知樞密使事中書侍  
郎同中書門下平章事集賢殿學士桑維翰為樞密使  
是日詔曰應天開國恭已臨人宜覃繼絕之恩以廣延

洪之道宜於唐朝宗屬中取一人封公世襲兼隋之鄜

公為三王後以後周介公備三恪主其祭祀及赴大朝

會

五代會要戴原敕云其唐朝宗屬中舊在朝及諸道為官者各據資歷考限滿日從品秩序遷已有出身

任令參選

以前鎮國軍節度使皇甫立為神武統軍以前宗

正卿李郁為太子賓客庚辰以吏部侍郎龍敏判戶部

二月丙戌以尚食使安友規充葬明宗皇后監護使以

河陽節度使安審暉為鄜州節度使癸巳詔停北京西

北面計度司事吳越國王錢元瓘加食邑實封改賜功

臣名號已亥詔應諸道行軍副使等得替後且就私家  
取便安止限一年後方得赴闕當便與比擬壬寅詔應  
諸道馬步都虞候自今後朝廷更不差補委自藩方于  
本州衙前大將中慎選久歷事任曉會行獄者充以三  
年限仍不得于元隨職員內差補以左散騎常侍孔子  
昭序為太子賓客尚書左僕射劉昫右僕射盧質加食  
邑食封甲辰以滄州留後馬全節為橫海軍節度使以  
太子賓客韓憚為貝州刺史左羽林統軍羅周敬為右

金吾衛上將軍丙午以皇子左驍衛上將軍重信為檢校太保河陽三城節度使以權知河陽軍州事周瓌為安州節度使詔中臣外僚或因差使出入竝不得薦屬人于藩鎮希求事任如有犯者竝準唐長興二年敕條處分戊申中書舍人陳乂改左散騎常侍應在朝文武百僚及見任刺史先代未封贈者與加封贈母妻未叙封者竝與叙封辛亥天和節帝御長春殿召左右街僧錄威儀殿內譚經循舊式也三月甲寅制北京留守太

原尹皇子重貴封食邑三百戶刑部侍郎張鵬改兵部侍郎已未御史臺奏唐朝定令式南衙常參文武百僚每日朝退于廊下賜食謂之常食自唐末辭離常食漸廢仍于入閣賜居日賜食每入閣禮畢閣門宣放仗羣官俱拜謂之謝食至僞主清泰年中入閣禮畢更差中使至正衙門口宣賜食百官立班重謝此則交失唐朝賜食之意于禮實為太煩臣恐因循漸失根本起今後入閣賜食望不差中使口宣準唐明宗朝事例處分從

之

五代會要載其年四月御史臺奏文武百官每月朔

聖入閣禮畢賜廊下食在京時祇于廟堂幕次兩廊

下今在行朝于正衙門外權為幕次房廊隘陝伏恐五

月一日朝會禮畢準例賜食于幕次難為排比伏見唐

明宗時兩省官于文明殿前廊下賜食今未審入閣日

權于正衙門內兩廊下排比賜食為復別有處分敕宜

依明宗時舊  
規廊下賜食

中書奏準敕故庶人三月七日以王禮葬

其妻男等竝以禮葬其妻其日朝參一日從之以宣徽

南院使楊彥詢為左監門衛上將軍依前充宣徽使充

州李從溫奏節度副使王謙搆軍士作亂尋已處置丙

寅詔王者省方設教靡憚于勤勞養士撫民必從其宜

便顧惟涼德肇啓丕圖常務去于煩苛冀漸臻于富庶  
念京城倣擾之後屬舟船焚蕪之餘饋運頓虧支費殊  
闕將別謀于飛輓慮轉困于生靈以此疚心未嘗安席  
今以夷門重地梁苑雄藩水陸交通舟車畢集爰資經  
度須議按巡寧免暫勞所期克濟取今月二十六日巡

幸汴州云

通鑑范延光聚卒繕兵悉召巡內刺史集魏  
州大作亂會帝謀徙都大梁桑維翰曰大梁

北控燕趙南通江淮水陸都都資用富饒今延光反形  
已露大梁距魏不過十驛彼若有變大軍尋至所謂疾  
雷不及掩耳也丙寅下詔託  
以洛陽漕運有關東巡汴州以前貝州刺史史圭為刑

部侍郎充諸道鹽鐵轉運副使前澤州刺史閻至為戶部侍郎詔車駕經過州府管界所有名山大川帝王陵廟名臣等去路十里者宜令本州排比祇候駕經過日以祭脯祭告左僕射劉昫等議立宗廟以立高祖以下四親廟其始祖一廟伏候聖裁御史中丞張昭遠議請依隋唐之制立四廟推四世之中名位高者為太祖詔下百官定議百官請依唐廟追尊四廟為定從之甲戌以右龍武統軍楊思權為左衛上將軍乙亥前鄜州節



度使張萬進加檢校太傅前宋州節度使李從敏加檢校太尉以吏部郎中兼待御史知雜事薛融為左諫議大夫以兵部郎中段希堯為右諫議大夫戊寅以戶部尚書王權為兵部尚書工部尚書崔居儉為戶部尚書兵部尚書李鱗為太子少保兵部尚書致仕裴皞為工部尚書東上閤門使李守貞為右龍武將軍充職庚辰車駕離京四月癸未朔至鄭州防禦使白景友進牲餼器皿帝曰不出民力否景友曰臣畏陛下法皆辦于已

俸命收之甲申駕入汴州丁亥制應天福二年四月五日昧爽已前諸道州府見禁囚徒大辟已下罪無輕重竝釋放天福元年諸道州府應係殘已前欠租稅竝特除免諸道係徵諸色人欠負省司錢物宜令自偽清泰元年終已前所欠者據所通納到物業外竝與除放昨者行至鄭州滎陽縣界路旁見有蟲食及旱損桑麥處委所司差人檢覆量與蠲免租稅河陽管內酒戶百姓應欠天福元年閏十一月二十五日已前不數年額麴

錢竝放其諸處應經兵火者亦與指揮當罪卽誅式明  
常典旣往可憫宜示深仁偽清泰中臣僚內有從誅戮  
者竝許收葬天下百姓有年八十已上者與免一子差  
徭仍逐處簡署上佐官梁故滑州節度使王彥章効命  
當時致身所事稟千年之生氣流百代之令名宜令超  
贈太師子孫量才叙錄應諸道州府管界有自偽命抽  
點鄉兵之時多是集劫結盜因此畏懼刑章藏隱山谷  
宜令逐處曉諭招攜各令復業自今年四月五日已前

為非者一切不問如兩月不歸業者復罪如初丁酉宣武軍節度使侍衛親軍使楊光遠加兼侍中己亥陝州節度使侍衛都虞侯劉知遠加檢校太保庚子北京業都徐兗二州竝奏早詔今後立妃及拜免三公宰相及命將封王公主宜令竝降制命餘從令式親處分夏五月壬子朔帝銜崇元殿受朝賀仗衛如式詔洛京魏府管內所徵今年夏苗稅物等宜放五分之一以微旱故也丙辰御史中丞張昭遠奏汴州在梁室朱氏稱制之

年有京都之號及唐莊宗平定河南復廢為宣武軍至明宗行幸之時掌事者因緣修葺衙城遂挂梁宮室時殿門牌額當時識者或竊非之一昨車駕省方暫居梁苑臣觀衙城內齋閣牌額一如明宗行幸之時無都號而有殿名恐非典據臣竊尋漢秦已來寰海之內鑾輿所至多立宮名近代隋室于揚州立江都宮太原立汾陽宮岐州立仁壽宮唐朝于太原立晉陽宮同州立長春宮岐州立九成宮宮中殿閣皆題署牌以類皇居準

準故事于汴州衙城門權挂一宮門牌額則餘齋閣竝可取便為名敕行闕宜以大寧宮為名湖南青草廟舊封安流侯進封廣利公洞庭廟進封靈濟公磊石廟舊封昭靈侯進封威顯公黃陵二妃廟舊封懿節廟改封昭烈廟從馬希範之請也戊午以前成德軍節度判官張彭為太府卿壬戌詔在朝文武臣僚每人各進封事一件仍須實封通進務裨闕政用副虛懷甲子以虞部部郎中知制誥于嶠為中書舍人以戶部郎中于邁為

部郎中知制誥故太子少保致仕朱漢賓贈司空乙丑  
六宅使王繼弘送義州衙前收管前洺州團練使高信  
送復州收管二人于崇禮門內喧爭爲臺司所劾故也  
戊辰翰林學士戶部員外郎知制誥竇固貞改工部郎  
中知制誥翰林學士都官郎中知制誥李慎儀改中書  
舍人仍賜金紫竝依舊充職庚午制封皇第二十一女  
爲長安公主封皇第十一妹烏氏爲壽安長公主皇第  
十二妹史氏爲永壽長公主皇第十三妹杜氏爲樂平

長公主壬申天雄軍節度使守太傅兼中書令興唐尹  
范延光進封臨清王加食邑三千戶鳳翔節度使檢校  
太師兼中書令西平王李從暉進封岐王丙子平盧軍  
節度使兼中書令王建立進封臨淄王昭信軍節度使  
侍衛馬軍都指揮使景延廣改寧江軍節度使典軍如  
故太常卿梁文矩奏定四廟諡號廟號陵廟太常少卿  
裴垣奏定四廟皇后追尊諡號從之戊寅以中書舍人  
權知貢舉王延爲御史中丞以翰林學士戶部侍郎知



制誥崔悅為兵部侍郎充承旨以翰林學士承旨兵部  
侍郎程遜為檢校禮部尚書太常以檢校卿禮部尚書  
太常卿梁文矩為吏部尚書以御史中丞張昭遠為戶  
部侍郎以吏部尚書盧文紀為太子少傅已卯詔太社  
內先收掌唐朝罪人首級等宜令骨肉或先舊僚屬收  
葬其喪葬儀制不得過制六月壬午朔制宗正卿石光  
贊奏滎陽道左有萬石君石奮之朝德行懿美宜示封  
宗用光遠祖之徽猷益茂我朝之典盛贈奮太傅癸未

契丹使伊勒希巴來聘致馬二百匹及人參貂鼠皮走馬木碗等物乙酉翰林學士司封員外郎知制誥王仁裕改都官郎中右贊大夫善盧損改右散騎常侍前有朝貶故也以祕書少監致仕劉頎為鴻臚卿致仕前光祿少卿尹玉羽以少府監致仕丙戌宰臣李崧上表讓樞密使于趙瑩以瑩佐命之元臣也詔不允以前義成軍節度使李彥舜為左武衛大將軍以左散騎常侍唐汭為檢校禮部尚書國子祭酒以前左龍武統軍李承

約為左驍衛上將軍戊子宰臣趙瑩自契丹使迴癸巳  
東都奏瀍澗河溢壞金沙灘內舍屋幽州趙思溫奏瀛  
莫兩州元係當道其刺史常行周白彥球乞發遣至臣  
本府詔遣行周等赴闕甲午六宅使張言自魏府迴奏  
范延光叛命滑州符彥饒飛奏有兵士自北來傳范延  
光到黎陽乞發兵屯禦宣遣客省使李守貞往延光所  
問罪尋命護聖都指揮使白奉進領騎士一千五百赴  
白馬渡巡檢乙未魏府范延光男閑廐使守圖送御史

臺攝荆南節度行軍司馬檢校太保歸州刺史王保義  
加檢校太傅知武泰軍節度觀察畱後充荆南行軍司  
馬兼沿淮檢使巡襄州奏江水漲一丈二尺丁酉遣內  
班史進能押信箭一對往滑州賜符彥饒以前磁州刺  
史劉審交為魏府計度使以東都巡檢使張從賓充魏  
府西南面都部署遣侍衛使楊光遠領步騎一萬赴滑  
州以東都副留守張延播充洛京都巡檢使白奉進奏  
捉得賊卒張柔稱范延光差澶州刺史馮暉充一行都

部署元從都押衙孫銳充一行兵馬都監帝覽奏謂侍  
臣曰朕雖薄德寡謀自謂不居近光之下而馮暉孫銳  
過于兒戲朝夕就擒安能抗拒大軍為我之患乎天平  
軍節度使安審琦起復舊任翰林學士禮部侍郎和凝  
改端明殿學士乙巳范延光差牙將王知新齎表到闕  
不令朝見收付武德司丁未詔侍衛使楊光遠充魏府  
西面都部署以張從賓充副兼諸軍都虞候昭義節度  
使高行周充魏府西面都部署是日張從賓亦叛與范

延光協謀害皇子河陽節度使重信皇子東都留守重

乂己酉以奉國都指揮使侯益護聖都指揮使我重威

領步騎五千往屯汜水關備從賓之亂

通鑑七月張從賓攻汜水關攻

巡檢使宋廷浩帝戎服嚴輕騎將奔晉陽以避之桑維翰叩頭苦諫曰賦鋒雖盛勢不能久請少待之不可輕

動帝久乃止

七月辛亥兩浙錢元瓘奏弟吳越士客馬步諸

軍都指揮史靜海軍節度使元球非時入府欲謀為亂

腰下搜得匕首已誅戮訖詔削元球在身官爵甲寅奉

國都指揮使馬萬奏滑州節度使符彥驍作亂屠害侍

衛馬軍都指揮使白奉進尋以所部兵擒到彥饒差立功都虞侯方太押送赴闕尋賜死于路是日削奪范延光在身官爵以馬萬為滑州節度使以昭義節度使高行周為河南尹東都留守充西面行營諸軍都部署以護聖左右廂都指揮使杜重威為昭義節度使兼侍衛馬軍都指揮使充西面行營副部署以奉國都指揮使侯益為河陽節度使以右神武統軍王周充魏府行營步軍都指揮使以滑州節節使馬萬充魏府行營馬軍

都指揮使以左僕射劉昫充東都留守兼判河南府事  
杜重威奏收下汜水等關破賊千人張從賓及其殘黨  
奔投入河兼收到護聖指揮使曹再晟一百人騎稱背  
賊投來竝送赴行闕升貝州為防禦使額皇子故東都  
留守重乂贈太傅皇子故河陽節度使重信贈太尉敕  
朋助張從賓逆人張延播張繼祚等十人宜令收捕親  
的骨肉竝處斬二卯以唐開府儀同三司守太尉兼中  
書令西平王李晟五代孫職為耀州司戶參軍示勸忠



之義也壬申帝御崇元殿備禮冊四廟親授寶冊于使  
攝太尉守司空門下侍郎平章事馮道使副攝司徒守  
工部尚書裴皞赴洛京行禮甲戌以宰臣趙瑩判戶部  
以吏部侍郎判戶部龍敏為東都副留詔洛守京留司  
百官竝赴闕安州軍亂指揮使王暉害節度使周瓌于  
理所遣右衛上將軍李金全領千騎赴安八月辛巳州  
以許州節度使裴從簡為徐州節度使以陝州節度使  
侍衛馬步軍都虞知遠劉侯為許州節度使以權北京

留守徐州節度使安彥威為太原尹北京留守河東節  
度使宰臣監修國史趙瑩奏請循近例依唐明宗朝凡  
有內廷公事及言動之間委端明殿學士或樞密院學  
士侍立冕旒繫日編綠逐季送當館其百司公事亦望  
逐季送當館旋要編修日歷從之丁亥以前宋州節度  
使李從敏為郟州節度使戊子以尚書致仕鄭韜光為  
戶部尚書致仕改立德殿為廣政殿門名從之庚子華  
州秦渭河泛溢害稼宰臣馮道加開府儀同三司食邑

實封左僕射劉昫加特進兼鹽鐵轉運等使故東京留守判官李遐可贈右諫議大夫其母田氏封京兆郡太君子孫量才叙錄仍加賻贈長結遐在身俸祿終母之世先是遐監左藏庫于洛陽會張從賓叛令強取錢帛遐拒而不與因而遇害故有是命乙巳詔天下見禁囚徒除十惡五逆放火劫舍持仗殺人合造毒藥官典犯贓欠負官賤外其餘不問輕重已發覺未發覺已結正未結正竝從釋放應自張從賓作亂有曾被張從賓及

賓及延播張脅從染汙者及符彥饒下隨身軍將等兼  
安州王暉徒黨除已誅戮外竝從釋放一切不問張繼  
祚在喪紀之中承逆豎之意顯從叛亂難貸刑章乃睠  
先臣實有遺德遽茲乏祀深所軫懷其一房家業準法  
雖已籍歿所有先臣并祖父母墳莊祠堂竝可交付骨  
肉主張應自梁朝後唐已來前紅奉使及北京沿邊管  
界擄掠往向北人口宜令官結錢物差使齎持往彼收  
贖放歸本家云繼祚故齊王全義之子也故有是詔丙

午詔天下刑獄繫囚染疾者宜差醫工治療官中量給藥價事輕者仍許家人看候合杖者俟損日決遺九月庚戌朔以前太府卿兼通事舍人陳瓚為衛尉卿兼通事舍人壬子故安遠軍節度使周懷贈太傅甲寅皇子北京留守知河東軍府事太原尹重貴加檢校太保為右金吾衛上將軍以右龍武統軍安崇院為右衛上將軍以前保太軍節度使檢校太府張萬進為右龍衛軍統軍以右領軍衛上將軍權安州軍州事知李金全為

安遠軍節度使魏府招討使楊光遠進攻城圖戊午以太子賓客孔昭序為工部尚書致仕將作少監高鴻漸上言伏覩近年已來士庶之家死喪之苦當殯葬之日被諸色音並伎藝人等作樂攪擾求覓錢物親行止絕從之庚申靜江軍節度使檢校太尉同平章事馬希杲加階爵及功臣名號以前兵部侍郎楊凝式為檢校兵部尚書太子賓客故右金吾衛上將軍羅周敬贈太傅乙丑鄧州節度使李從璋卒贈太師改興唐府為廣晉

府興唐縣為廣晉縣以左諫議癸酉大夫判度支王松  
為尚書工部侍郎甲戌貝衛兩州奏河湓害稼乙亥以  
將作監王岷為太子賓客十月壬午以宣徽南院使左  
監門衛上將軍楊彥詢為鄧州威勝軍節度使詔選人  
試判兩道以左司郎中張瑒為右諫議大夫以刑部侍  
郎鹽鐵轉運副使史圭為吏部侍郎以曹州刺史宋光  
業為宣徽北院使以左金吾衛大將軍高漢筠為左驍  
衛大將軍充內客省使以宣徽北院使左驍衛大將軍

劉處讓為左監門衛上將軍充宣徽南院使丙戌遣使  
祀五嶽四瀆故天平軍節度使閻寶追封太原郡王故  
大同軍節度使李存璋贈太師故瀛州刺史李嗣顏贈  
太尉故相州刺史史建瑋故代州刺史王建及竝贈太  
保故幽州節度使周德威追封燕王十一月庚戌賜楊  
光遠空名官告自司空至常侍凡四十道將士立功者  
得補之而後奏中書上言準唐貞元二年九月五日敕  
文官充翰林學士及皇太子諸王侍讀武官充禁軍職



事竝不常朝參其在三館等諸職事者竝朝參訖各歸  
所務自累朝以來文武在內廷充職兼判三司或帶職  
額及六軍判官等例不赴常朝元無正敕準近敕文武  
職事官未升朝者按舊制竝赴朔望朝參其翰林學士  
侍讀三館職事望準元敕處分其諸在內廷諸司使等  
每受正官之時來赴正衙謝後不赴常朝大朝會不離  
禁廷位次三司職官免常朝惟赴大朝會其京司未升  
朝官員祇赴朔望朝參帶諸司職掌者不在此例文官

除端明殿翰林學士樞密院學士中書省知制誥外有  
兼官兼職者仍各發遣本司公事從之丙辰太子賓客  
王岷卒改潞京潛龍宅為廣德宮北京潛龍宅為興義  
宮戊午中書奏準雜令車駕巡幸所祇承者賜會竝同  
京官從之戊辰鎮海鎮東節度使吳越王錢元瓘加天  
下兵馬副元帥封吳越國王庚午以右拾遺李漸充翰  
林學士甲戌命太常卿程遜兵部員外郎韋梈充吳越  
國王加恩使丙子以戶部侍郎張昭遠守本官充翰林

學士仍知制誥丁丑湖南馬希範貢寶裝龍鳳器銀花  
果子等物帝覽之謂侍臣曰奇巧蕩心斯何用耳但以  
來遠之道用結不欲阻其意聞者服之壬午安州李金  
全上言奉詔抽臣元隨左都押衙胡漢筠其人染重病  
侯損日赴闕漢筠本滑吏也從金全歷數鎮而濫聲誼  
聞帝知之欲授以他職免陷功臣漢筠懼其罪遂託疾  
由是勸金全貳于朝廷自此始也十二月以監察御史  
徐台符爲尚書膳部員外郎知制誥以右補闕史官修

撰吳承範為尚書屯田員外郎知制誥左諫議大夫薛  
融改中書舍人辭而不拜尚書水部郎中知制誥王易  
簡改中書舍人故隴西郡王李嗣昭追封韓王故橫海  
軍節度使安審通贈太師辛丑湖南節度使兼中書令  
楚王馬希範加食邑實封改賜扶天佐運同德致理功  
臣甲辰車駕幸相國寺祈雪

舊五代史卷七十六

舊五代史卷七十六考證

晉書高祖紀二甲戌車駕至昭義 案歐陽史通鑑並

從是書作甲戌至潞遼史作辛未與是書異

己卯至河陽北 案是書唐紀作庚辰晉帝至河陽遼

史又作辛己並與此紀異通鑑作己卯與此紀同

乙卯日有蝕之 案五代春秋作正月乙卯朔日食通

鑑考異引十國紀年蜀人亦以乙卯為朔蓋晉人避

正朔日食故改甲寅朔耳

定州奏契丹改幽州為南京 南京歐陽史作燕京通鑑遼史契丹國志並作南京

安州上言節度使盧文進殺行軍副使率部下親兵過淮 案盧文進棄鎮奔吳通鑑作元年十二月五代春秋歐陽史作二年正月與是書同

洞庭廟進封靈濟公 案洞庭廟不載舊封疑有脫文考五代會要十國春秋並與是書同

磊石廟舊封昭靈侯進封威顯公 威顯公五代會要

作廣利威顯公

以奉國都指揮使侯益為河陽節度使 案宋史侯益

傳晉祖名益謂曰宗社危若綴旒卿能為朕死耶益

曰願假銳卒五千人破賊必矣以益為西面行營副

都部署据是書高行周為都部署杜重威為副部署

不言侯益為副都部署與宋史異

杜重威等奏收下汜水關破賊千人張從賓及其殘黨

奔投入河 案宋史侯益傳益率禁兵數千人次虎

牢從賓軍萬餘人夾汜水而陣益親鼓士乘之大敗  
其衆擊殺殆盡汜水為之不流從賓乘馬入河溺死  
据是書祇言破賊千人與宋史異

安州軍亂指揮使王暉害節度使周瓌於理所 案王  
暉害周瓌五代春秋通鑑俱不書日歐陽史作丙子  
是書作甲戌諸史所載俱異

大詳袞舊作大相温今改 伊勒希已舊作夷離畢今  
改





舊五代史卷七十六考證

欽定四庫全書

舊五代史卷七十七

宋門下侍郎參知政事監修國史薛居正等撰

晉書第三

高祖紀三

天福三年正月戊申朔帝御崇元殿受朝賀仗衛如式  
已酉百守司以太史先奏日蝕蝕故也至是不虧內外  
稱賀壬戌是夜以上元張燈於京城縱都人遊樂帝御

大寧宮門樓觀之丙寅端明殿學士禮部侍郎和凝兼  
判度支工部侍郎判度支王松改尚書刑部侍郎戶部  
郎中高延賞改左諫議大夫充諸道鹽鐵轉運副使

申以前右諫議大夫薛融為左諫議大夫前興元節度

使張筠卒於西京輟視朝一日

五代會要太常禮院申  
準故事前節度使無例

輟朝敕宜特  
輟一日朝參

二月庚辰左散騎常侍張允進駁敕論帝

覽而嘉之降詔獎飾仍付史館甲申荆南節度使高從  
誨加食邑實封戊子翰林學士李瀚賜緋魚袋以尚書

屯田員外郎知制誥吳承範為庫部員外郎充樞密院直學士乙未御札曰會有宣示百官令進封事今據到者未及十人朕雖無德自行敕後已是數月至於假手于人也合各有一件事敷奏食祿於朝豈當如是言而不用朕所甘心用而不言誰之責也丙申制武清軍節度使馬希萼改威武軍節度使辛丑中書上言禮經云禮不諱嫌名二名不偏諱注云嫌名謂聲音相近若禹與雨丘與區也二名不偏諱謂孔子之母名徵在言在

不稱徵言徵不稱在此古禮也唐太宗二名並諱玄宗  
二名亦同人姓與國諱音聲相近是嫌名者亦改姓氏  
與古禮有異廟諱平聲字即不諱餘三聲諱仄聲即不  
諱平聲字所諱字正文及偏旁闕點畫望依令式施行  
詔曰朝廷之制今古相沿道在人弘禮非天降方開歷  
數虔奉祖宗雖踰孔子之文未爽周公之訓所謂二名  
及嫌名之宜依唐禮施行

按太原縣有史匡翰碑立于天福八年匡翰建唐之子也

碑于瑋字空文以避諱而建唐父敬思仍書敬字蓋當時避諱之體如此

乙巳天和節宴近

臣於廣政殿三月戊午鴻臚卿劉頎卒贈太子賓客壬戌東上閣門使前司農卿蘇繼顏改鴻臚卿充職回鶻可汗王仁美進野馬獨峯駝玉團硎砂等方物甲戌永壽長公主薨輟朝一日故涇州節度使察畱後盧順密贈右驍衛上將軍丁丑詔禁止私下打造鑄瀉銅器四月丁亥以尚書吏部侍郎盧詹為尚書左承中書舍人李詳上疏請沙汰在朝文武臣僚以減冗食仍條貫藩侯郡守凡遇溥恩不得多奏衙門職員妄邀恩澤疏奏

嘉之戊子宣武軍節度侍衛親軍馬步軍都指揮使廣  
晉府行營都招討使楊光遠加兼中書令昭義節度使  
侍衛馬軍都指揮使廣晉府行營都排陣使杜重威河  
陽節度使兼奉國左右廂都揮使使廣晉府行營馬步  
都虞侯侯益並加檢討太尉鳳翔節度使檢校太師兼  
中令令岐王李從曠進封秦王平盧軍節度使檢校軍  
節度使李從溫西京畱守京口尹李周歸德軍節度使  
趙在禮並加兼侍中是月諸道藩侯郡守皆等第加恩



趙在禮並加兼侍中是月諸道藩侯郡守皆等第加恩  
改雍熙樓為章和樓避廟諱也五月丁未朔帝御崇元  
殿受朝仗衛如式丁巳詔應諸州縣名犯廟諱者並改  
之庚申以楊光遠男承祚為檢校工部尚書左威衛將  
軍駙馬將軍丁卯魏府行營步軍都指揮使檢校司徒  
右神武統軍王周加檢校太保戊辰故振武節度使李  
嗣本贈太尉己巳詔中臣僚並帶平章事侍中中書令  
及諸道節度使並許私門立戟仍並給官及據官品依

令式處分六月丁丑右監門衛上將軍王彥璘卒甲申  
以太子詹事王居敬制置安邑解縣兩池榷鹽事左諫  
議大夫薛融上疏請停修洛京大內優詔褒之尋罷營  
造庚寅翰林學士尚書工部郎中知制誥竇貞固改中  
書舍人充職戶部尚書致仕蕭遼卒贈右僕射詔貢舉  
宜權停一年以員闕少而選人多常調有淹滯故也丁  
酉詔尚書司門應管諸闕令承等宜準唐天成四年四  
月四日敕本司不得補差祇委闕鎮使鈐轄見差補者

並畫時勒停訖奏聞應常帶使相節度使自楊光遠已下凡七人並改鄉里名號七月丙午朔差左諫議大夫薛融祕書監呂琦駕部員外郎兼侍御史知雜事劉皞刑部郎中司徒詡大理正張仁瑒同共詳定唐明宗朝編敕庚戌御史中丞王延改尚書右丞尚書右丞盧導改尚書吏部侍郎以左諫議大夫薛融為御史中丞辛酉制皇帝受命寶以受天明命惟德允昌為文據六典受命寶者天子修封禪禮神祇則用之其始皆破皇業

錢以製之皇業者藩邸主事之所有也

五代會典天福三年六月中書

門下奏準敕製皇帝受命寶今按唐貞觀十六年太宗文皇帝所刻之璽白玉為螭首其文曰皇帝景命有德者昌敕宜以受天明命

惟德允昌為文刻之 壬戌虞部郎中知制誥於運改

中書舍人宰臣趙營桑維翰李崧各改鄉里名號荆南節度使高從誨本貫汴州浚儀縣王畿鄉表節東坊改為擁旌鄉浴鳳里八月戊寅以左僕射劉昫為契丹冊禮使左散騎常侍章勲副之給事中盧重為契丹皇太后冊禮使壬午魏府軍前奏前澶州刺史馮暉自逆城

來歸定州奏境內旱民多流散詔曰朕自臨寰宇每念  
生民務切撫綏期於富庶屬干戈之未戢慮徭役之或  
煩惟彼中山偶經夏旱因茲疾苦遽至流移達我聽聞  
深懷憫惻應定州所差軍前夫役逃戶夏秋稅並放甲  
申襄州奏漢江水漲一丈一尺已丑以前澶州刺史馮  
暉為檢校太保充義成軍節度使詔河府同州絳州等  
三處災旱逃移人戶下所欠累年殘稅并今年夏稅差  
科及麥苗子沿徵諸色錢物等並放其逃戶下秋苗據

見檢校數不計是元額及出剩頃畝並放一半委觀察  
使散行曉諭專切攜應歸業戶人仍指揮逐縣切加安  
撫翰林學士中書舍人竇貞固上言請令文武百僚逐  
司之內各奏舉一人述其人有某能堪為某官某職據  
所薦臧否定主舉黜陟

宋史竇貞固傳載此疏畧云為國之要進賢是先陛下方樹丕

基宜求多士乞降詔百僚令各司議定一人有何能識堪何職官朝廷依奏用之若能符薦引果謂當才所奏之官望加獎賞如乖其舉或涉徇私所奏之官宜加黜罰自然官由德序位以才升三人同行尚聞擇善十目所視必不濫加臣職  
疏奏嘉之仍令文武百官於晉紳  
在論思敢陳狂狷

之內草澤之中知灼然有才器者列名以春宴契丹冊  
禮使於廣政殿戊戌鄆州奏陽穀縣界河決青州王建  
立奏高麗國宿衛質子王仁翟乞放歸鄉里從之辛丑  
鎮邢定三州奏奉詔共差樂官六十七人往契丹詔魏  
府城下自屯軍以來墳墓多經斲掘雖已差人收掩今  
更遣太僕卿邢德昭往伸祭奠九月己酉宮苑使焦繼  
勳自軍前押范延光牙將馬諤齎歸命請罪表到闕壬  
子延光領部下士素服於本府門俟命有詔釋罪乙卯

詔司空兼門下侍郎平章事馮道官一品給門戟十六枝中書侍郎平章事桑維翰李崧給門戟十二枝己未宣遣靜鞭官劉守威左金吾仗勘契官王英司天臺雞叫學生商暉等竝赴契丹庚申契丹使人往洛京般取

趙氏公主

宋史趙贊傳德鈞父子降晉契丹盡錮之北去贊獨與母公主留西洛天福三年晉祖命

贊奉母歸蜀門

襄州奏漢江水漲三丈出岸害稼東都奏洛陽

水漲一丈五尺壞下浮橋乙丑於闐國王楊仁美遣使貢方物回鶻可汗遣使貢駝馬丙寅趙延壽進馬謝恩



放燕國長公主歸幽州范延光差節度副使李式到闕  
奉表首罪兼進玉帶一條遣宣徽南院使劉處讓權知  
魏府軍府事己巳復范延光官爵其制略曰頃朕始登  
大寶未靜中原六飛纔及於京師千里未通於懷抱楚  
王求舊方在遺簪曾子傳疑忽成投杼尋聞悛悔遽戮  
姦回干戈俄至於經時雷雨因思於作解果馳賓介疊  
貢表章向丹闕以傾心瀝表誠而効順而沉保全黎庶  
完整甲兵納款斯來其功非細得不特頒鐵契重建牙

章封本郡之土茅移樂郊之旌鉞至於將吏咸降絲綸  
於戲上玄之運四時不愆者信大道之崇三寶所重者  
慈活萬戶之傷夷息六師之勞瘁遂予仁憫旌爾變通  
永貽子孫長守富貴敬佩光寵可不美歟可復推誠奉  
義佐運致理功臣天雄軍節度管内觀察處置等使開  
府儀同三司府太傅兼中書令廣晉尹上柱國臨清王  
食邑一萬戶食實封一千戶改授鄆州刺史天平軍節  
度鄆齊原本闕一字等州觀察處置等物賜鐵券改封高平

郡王仍令擇日備禮冊命以天雄軍節度副使檢校刑部尚書李式檢校尚書右僕射充亳州團練使以貝州刺史孫漢威為檢校太保隴州防禦使以天雄軍三城都巡檢使薛霸為檢校司空衛州刺史以天雄軍馬步軍都指揮使王建為檢校司空虢州刺史以天雄軍內外馬軍都指揮使藥元福為檢校司空深州刺史以天雄軍內外步軍都指揮使安元霸為檢校司空隨州刺史以天雄軍都監前河陽行軍司馬李彥珣為檢校司

空坊州刺史李式延光之舊僚也其餘皆延光之將佐也故有是命庚午遣客省使李守貞押器幣賜魏府立功將校辛未以魏府招討使楊光遠檢校太師兼中書令行廣晉伊天雄軍節度使十月乙亥福建節度使王繼恭遣使貢方物戊寅契丹命使以寶冊上帝徽號曰英武明義皇帝

歐陽史作契丹使中書令韓頻來奉冊

是日左右金吾

六軍儀仗太常鼓吹等並出城迎引至崇元殿前陳列如儀鄆州范延光奏到任內庚辰御札曰為國之規在

於敏政建都之法務要利民歷攷前經朗然通論顧惟  
涼德獲啓丕基當數朝戰伐之餘是兆庶傷殘之後車  
徒旣廣帑廩咸虛經年之輓粟飛芻繼日而勞民動衆  
常煩漕運不給供須今汴州水陸要衝山河形勝乃萬  
庾千箱之地是四通八達之郊爰自按巡益觀宜便俾  
升都邑以利兵民汴州宜升為東京置開封府仍升開  
封浚儀兩縣為赤縣其餘升為畿縣應舊置開封府時  
所管屬縣並可仍舊割屬收管亦升為畿縣其洛京改

為西京其雍京改為晉昌軍留守改為節度觀察使依舊為京兆府列在七府之上其曹州改為防禦州其餘制置竝委中書門下商量施行丙戌以護聖左廂都指揮使曹州刺史張彥澤為鎮國軍節度使以工部尚書裴皞為尚書右僕射致仕是日詔改大寧宮門為明德門又改京城諸門名額南門尉氏以薰風為名西二門鄭門梁門以金義乾明為名北二門酸棗門封丘門以玄化宣陽為名東二門曹門宋門以迎春仁和為名戊

子以右金吾大將軍馬從斌為契丹國信使考功郎中  
劉知新副之以前天平軍節度使檢校太尉同平章事  
安審琦為晉昌軍節度使行京兆尹襄州奏江水漲害

稼壬辰以樞密使中書侍郎平章事集賢殿大學士桑

維翰兼兵部尚書皆罷樞密使

案以上疑有闕文據通鑑攷異引晉高祖實錄

維翰與李崧並罷樞密使

戊戌大赦天下以魏府初平故也庚子楊

光遠朝覲到闕對於便殿錫賚甚厚於闕國王李聖天  
冊封為大寶於闕國王以杭州嘉興縣為秀州從錢元

璿之奏也十一月甲辰樞密直學士祠部員外郎吳涓  
可金部郎中知制誥樞密直學士庫部員外郎吳承範  
可祠部郎中知制誥乙巳鄆州范延光來朝丙午封閩  
王昶為閩國王加食邑一萬五千戶又以中吳建武等  
軍節度使檢校太師兼中書令蘇州誠州刺史錢元璿  
為太傅以清海軍節度使廣州刺史錢元璿為檢校太  
尉兼中書令仍改名元懿應付魏府行營將校及六軍  
諸道本城將校等竝與加恩戊申以門下侍郎平章事



監修國史判戶部趙瑩兼吏部尚書以威武軍節度福建管內觀察處置等使王繼恭為特進檢校太傅仍封臨海郡王以魏博節度使楊光遠為守太尉洛京畱守兼河陽節度使判六軍諸衛事端明殿學士尚書禮部侍郎判度支和凝改尚書戶部侍郎充職庚戌鄆州范延光上表乞休退詔不允辛亥升廣晉府為鄴都置鶚守升廣晉元城兩縣為赤縣屬府諸縣升為畿縣升相州為鄴德軍置節度觀察使以澶衛二州為屬郡其澶

州仍升為防禦州移於德勝口為治所升貝州為永清  
軍置節度觀察使以博冀二州為屬郡以西京留守高  
行周為廣晉鄴都留守廣晉府行營中軍使貝州防禦  
使王廷胤加檢校大傅充相州彰德軍節度使廣晉府  
行營步軍都指揮使右神武統軍王周為貝州永清軍  
節度使甲寅以范延光為太子太師致仕丙辰以祕書  
監呂琦為禮部侍郎歸德軍節度使趙在禮改天平軍  
節度使昭義軍節度使兼侍衛親軍馬步軍都虞候杜

重威改忠武軍節度使忠武軍節度使侍衛親軍馬步  
軍都指揮使劉知遠改歸德軍節度使前河陽節度使  
兼奉國左右廂都指揮使侯益改昭義軍節度使癸亥  
割濮州濮陽縣隸澶州詔許天下私鑄錢以天福元寶  
為文丙寅冬至帝御崇元殿受朝賀仗衛如式十二月  
甲戌朔以前兵部尚書梁文矩為太子少師以鎮州節  
度副使符蒙為右諫議大夫以吏部郎中曹國珍為左  
諫議大夫丙子以前涇州彰義軍節度使李德琬為晉

州建雄軍節度使加同平章事以皇太子右金吾衛上將軍重貴為檢校太傅開封尹封鄭王加食邑三千戶戊寅大寶於闐國進奉使檢校太尉馬繼榮可鎮國大將軍使副黃門將軍國子少監張再通可試衛尉卿監使殿頭承旨通事舍人吳順規可試將作少監回鶻使都督李萬金可歸義大將軍監使雷德順可順化將軍是日詔宜令天下無問公私應有銅欲鑄錢者一任取便酌量輕重鑄造戊子以河陽潛龍舊宅為開晉禪院

邢州潛龍舊宅為廣法禪院龍武統軍李從昶卒輟朝  
一日贈太尉

舊五代史卷七十七

舊五代史卷七十七攷證

晉書高祖紀三八月戊寅以左僕射劉煦為契丹丹禮使左散騎常侍韋勲副之給事中盧重為契丹皇太后丹禮使案歐陽史八月戊寅馮道及左僕射劉煦為契丹丹禮使通監戊寅以馮道為太后丹禮使左僕射劉煦為契丹主丹禮使與是書此紀異

左金吾仗勛契官王英司天臺鷄叫學生商暉等王

英歐陽史作王殷商暉歐陽史作殷暉蓋是書避宣

祖諱

九月己酉宮苑使焦繼勳自軍前押范延光牙將馬諤齎歸命請罪表到闕。士子延光領部下士素服於本府闕候命有詔釋罪。案歐陽史作九月己酉赦范延光蓋併書於奉表請罪之日也。

以右金吾大將軍馬從斌為契丹國命史考功郎中劉知新副之。案馬從斌使契丹以報具加尊號也。攷通鑑則始以命王權權辭以老疾乃改命從斌耳。歐



陽史止書從斌不載劉知新五代春秋作十月馮道  
使契丹

舊五代史卷七十七攷證

欽定四庫全書

舊五代史卷七十八

宋門下侍郎參知政事監修國史薛居正等撰

晉書第四

高祖紀四

天福四年春正月癸卯帝御崇元殿受朝賀伏衛如式  
丙午召太子太師致仕范廷光宴于便殿以延光歸命  
之後慮懷疑懼故休假之內錫以款密帝謂之曰無念

疾以傷厥神無憂思以勞厥衷朕方示信于四方豈食  
言于汝也延光俯伏拜謝其心遂安丁未以西京副畱  
守龍敏為吏部侍郎戊申盜發唐閔帝陵己酉朔方軍  
節度使張希崇卒贈太師以澶州防禦使張從恩為樞  
密副使甲寅以侍衛步軍都指揮使寧江軍節度使景  
延廣為義成軍節度使以義成軍節度使馮暉為朔方  
軍節度使乙卯左諫議大夫曹國珍上言請于內外臣  
寮之中選才畧之士聚唐六典前後會要禮閣新儀大

中統類律令格式等精詳纂集俾無漏落別爲書一部  
目爲大晉政統從之其詳議官宜差太子少卿梁文矩  
左散騎常侍張允大理卿張澄國子祭酒唐訥大理少  
卿高鴻漸國子司業田敏禮部郎中呂咸休司勳員外  
郎劉濤刑部員外郎李知損監察御史郭延升等一十  
九人充文矩等咸曰改前代禮樂刑憲爲大晉政統則  
堯典舜典當以晉典革名列狀駁之曰作者之謂聖述  
者之謂明苟非聖明焉能述作若運因革故則事乃惟

新或改正朔而變犧牲或易服色而殊徽號是以五帝  
殊時不相沿樂三王異世不相襲禮至于近代率由舊  
章比及前朝日滋條目多因行事之失改爲立制之初  
或臣奏條章君行可否皆表其年月紀以姓名聚類分  
門成文作則莫不悉稽前典垂範後昆述自聖賢歷于  
朝代得金科玉條之號設亂言破律之防守而行之其來  
尚矣皇帝陛下運齊七政歷契千年爰從創業開基莫  
不積功累德所宜直筆具載鴻猷若備錄前代之編年

目作聖朝之政統此則是名不正也夫名不正則言不順而媚時掠美非其實矣若翦截其辭此則是文不備也夫文不備則啓爭端而禮樂刑政于斯亂矣若改舊條而爲新制則未審何門可以刊削何事可以編聯既當革故從新又須廢彼行此則未知國朝能守不能守乎臣等同共參詳未見其可疏奏嘉之其事遂寢辛酉以前晉昌軍節度使李周爲靜難軍節度使是日封皇第十一妹安定郡主爲延慶長公主皇第十二妹廣平

郡主爲清平長公主二月辛卯改東京玉華殿爲永福殿中書上言太原潛龍莊望建爲慶長宮使相鄉望改爲龍飛鄉都尉里望改爲神光里從之丁酉宰臣馮道左散騎常侍韋勲禮部員外郎楊昭儉自契丹使廻帝慰勞備至錫賚豐厚庚子以天和節宴羣官于廣政殿賜物有差三月癸卯朔左僕射劉昫給事中盧重自契丹使廻頒賜器幣如馮道等乙賜廻鶻可汗仁美遣使供方物中有玉玃玃寶竒貨也丙午涇州節度使張萬



進卒贈太師己未皇子開封尹鄭王重貴歸德軍節度使兼侍衛親軍馬步軍都指揮使劉知遠忠武軍節度使杜重威並加同中書門下平章事天平軍節度使趙在禮封衛國公庚申遣內臣趙處玘以版詔徵華山隱者前右拾遺鄭雲叟玉筍山道士羅隱之靈州戍將王彥忠據懷遠城作叛帝遣供奉官齊延祚乘驛而往彥忠率衆出降延祚矯制殺之詔齊延祚辜我誓言擅行屠戮彰殺降之罪陳示信之文宜除名決重杖一頓配

流王彥忠贈官收葬辛酉封廻鶻可汗仁美爲奉化可  
汗癸亥以左龍武統軍皇甫遇爲鎮國軍節度使張彥  
澤爲彰義軍節度使夏四月壬申朔以河中節度副使  
薛仁謙爲衛尉卿丙子以汝州防禦使宋彥筠爲同州  
節度使以護聖左右軍都指揮使李懷忠爲侍衛親軍  
馬軍都指揮使領壽州忠正軍節度使以奉國左右廂  
都指揮使郭謹爲侍衛親軍步軍都指揮使領州寧江  
軍節度使戊寅詔廢長春宮使額

五代會要載原勅云  
同州長春宮使額宜

停浴宮職務乙卯改明德殿為滋德殿宮城南門同名  
委州司制置

故也以華州節度使劉遂凝為右龍武統軍以右龍武  
統軍張延蘊為絳州刺史庚辰徵前右拾遺鄭雲叟為  
右諫議大夫王筍山道士羅隱之賜號希夷先生甲申  
以翰林學士承旨兵部侍郎崔棬權判太常卿以端明  
殿學士戶部侍郎和凝為翰林學士承旨樞密院學士尚  
書倉部郎中司徒詔樞密院學士尚書工部郎中顏衍  
並落職守本官樞密副使張從恩改宣徽使初廢樞密

院故也先是桑維翰免樞密之務以劉處讓代之奏議多不稱旨及處讓丁母憂遂以密院印付中書故密院廢焉戊戌以韓昭胤爲兵部尚書致仕馬胤孫爲太子賓客致仕房皐爲右驍衛大將軍致仕皆唐末帝之舊臣也戊子升永岳二州爲團練使額改湘川縣爲全州從馬希範之奏也五月壬寅朔帝御崇元殿受朝仗衛如式癸卯以左僕射劉昫兼太子太保封譙國公乙巳照順軍節度使姚彥章卒升靈州方渠鎮爲威州隸于

靈武改舊威州爲清邊軍戍申湖南節度使馬希範加  
天策上將軍以前邠州節度使安叔千爲滄州節度使  
庚戌虞部郎中楊昭儉可本官知制誥辛亥置靜海軍  
于温州從錢元瓘之請也壬子以侍御史盧價爲戶部  
員外郎知制誥戶部尚書崔榆卒甲寅詔止絕朝臣不  
得外州府求覓表狀奏薦交親乙卯升金州爲節鎮以  
懷德軍爲使額以齊州防禦使潘瓌爲懷德軍節度使  
右諫議大夫致仕鄭雲叟賜號逍遙先生仍給致仕官

俸丁己以刑部尚書姚顗爲戶部尚書以兵部侍郎權  
判太常卿事崔稅爲尚書左丞以工部侍郎任贊爲兵  
部侍郎以禮部尚書李憚爲刑部尚書以左丞盧詹爲  
禮部尚書以左散騎常侍韋勲爲工部侍郎唐申廢華  
清宮爲靈泉觀辛酉御史臺奏省郎知雜之時赴臺禮  
上軍巡郎吏之輩咸集公參赤縣府司悉呈杖印今後  
年深御史判雜上事欲依前例從之丙寅以鎮海軍衙  
內統軍上置馬步軍都監檢校太傅睦州刺史陸仁章

爲同平章事遙領遂州武信軍節度使以鎮海軍興武  
左右開道都指揮使明州刺史仰仁銓爲檢校太傅同  
平章事領宣州寧國軍節度使從錢元瓘之請也六月辛  
未朔陳郡民王武穿地得黃金數餅州牧取而貢之帝  
曰宿藏之物既非符寶不合入官命付所獲之家庚辰  
西京大風雨應天福門屋瓦皆飛鵲吻俱折辛卯詔禮  
部貢舉宜權停一年秋七月庚子朔日有食之西京大  
水伊洛渥澗盡溢壞天津橋癸卯以華清宮使李頎爲

右領軍衛上將軍甲辰以定州節度使皇甫遇爲潞州  
節度使檢校太尉以潞州節度使侯益爲徐州節度使  
戊申御史中丞薛融等上詳定編勅三百六十八道分  
爲三十一卷是日詔先令天下州郡公私鑄錢近多鉛  
錫相兼缺薄小弱有違條制今後私鑄錢下禁依舊法  
壬戌以太子少保梁文矩爲太子太保致仕閏七月庚  
午朔百官不入閣雨霑服故也壬申以中書侍郎平章  
事集賢殿大學士桑維翰爲檢校司空兼侍中相州彰



德軍節度使以彰德軍節度使王延盾爲義武軍節度使尚書戶部奏李自倫義居七世準勅旌表門閭先有鄧州義門王仲昭六代同居其旌表有廳事步欄前列屏樹烏頭正門閭闊一丈二尺二柱相去一丈柱端安瓦桶墨染號爲烏頭築雙闕一丈在烏頭之南三丈七尺夾街十有五步槐柳成列今舉此爲例則令式不該詔王仲昭正廳烏頭門等制不載令文又無勅命既非故事難續大倫宜從令式祇表門閭于李自倫所居之

前量地之宜高其外門門外安緯櫟門外左右各建一臺高一丈二尺廣狹方正稱臺之形巧以白泥四隅漆赤其行列樹植隨其事力其同籍課役一準令文壬午濮州刺史武從諫勒歸私第受贓十五萬故也丁酉故皇子河南尹重乂妻號國夫人李氏落髮爲尼賜名悟因仍錫紫衣法號及夏臘二十八月己亥朔河決博平甘陵大水辛丑以守司空兼門下侍郎平章事弘文館大學士馮道爲守司徒兼侍中封魯國公壬寅詔曰皇

圖革故庶政惟新宜設規程以諧公共其中書印紙委  
上位宰臣一人知當戎申前兵部尚書王權授太子少  
傅致仕乙酉以天下兵馬副元帥鎮海鎮東等軍節度  
使檢校太師行中書令吳越王錢元瓘爲天下兵馬元  
帥壬子升亳州爲防禦使額依舊隸宋州丙辰司天監  
馬重績等進所撰新歷降詔褒之詔翰林學士承旨和  
凝制序命之曰調元歷九月辛未以右羽林統軍周密  
爲鄜州節度使癸酉升婺州爲武勝軍額丁丑宴羣臣

于永福殿契丹使默納庫來聘致牛馬大脂顛騾十四

遼史會同二年正月戊申晉遣金吾衛大將軍馬從斌考功郎中劉知新來貢珍幣丙辰晉遣使謝免沿邊四州錢幣七月戊申晉遣使進犀帶閏月乙酉遣使賜晉良馬八月乙丑晉遣使貢歲幣奏輸戊亥二歲金幣于燕京已卯遙領洮州保順軍節度使鮑君福加檢校太師兼侍中判湖州諸軍事辛巳相州節度使桑維翰上言管内所獲賊人從來籍沒財產請止之詔今後凡有賊人準格律定罪不得沒納家資天下諸州準此癸未封唐許王李從益爲郇國公奉唐之祀服色旌旗一依舊制

仍以西京至德宮爲廟牲幣罷服悉從官給

五代會要九月勅周

受龍圖立夏殷之祀唐膺鳳歷開鄭介之封乃臚前朝載稽舊典宜封土宇俾奉宗祧宜以邠國三千戶封唐

許王李從益爲邠國公云

丙戌高麗王王建遣使貢方物己丑以中

書侍郎平章事李崧權判集賢殿事庚寅詔停寒食七

夕重陽及十月暖帳內外羣官貢獻丙申以威勝軍節

度副使羅周岳爲給事中中書舍人李詳改禮部侍郎

禮部侍郎呂琦改刑部侍郎刑部侍郎王松改戶部侍

郎戶部侍郎閻至改兵部侍郎中書舍人王易簡充史

館修撰判館事冬十月戊戌朔故昭信軍節度使白奉  
進贈太尉丙午以太常卿程遜没于海廢朝一日贈右  
僕射庚戌閩王王昶威武軍節度使王繼恭遣僚佐林  
思鄭元弼等朝貢致書于宰執無人臣之禮帝怒詔令  
不受所貢應諸州綱運並令林思鄭元弼等押歸本道  
既而兵部員外郎李知損上疏請禁錮使人籍沒綱運  
可之收林思等下獄丙辰谿州刺史彭士愁以錦蔣之  
兵與蠻部萬人掠辰澧二境湖南節度使馬希範遣牙

兵拒之而退金州山賊度從譙等寇洵陽遣兵討平之  
十一月甲戌以太子賓客李延範為司農卿乙亥詔立  
唐高祖太宗及莊宗明宗閔帝五廟于洛陽丁丑祠部  
郎中知制誥吳承範改中書舍人充翰林學士翰林學  
士中書舍人竇貞固改御史中丞御史中丞薛融改尚  
書左丞尚書右丞王延改吏部侍郎尚書左丞崔稅改  
太常卿戊寅史館奏請令宰臣一人撰錄時政記逐時  
以備撰述從之

五代會要史館奏唐長壽二年右丞姚  
璩奏帝王謨訓不可闕文其仗下所言

軍國政事令宰臣一人撰錄號時政記唐明宗朝又委  
端明殿學士撰錄逐季送付史館伏乞遵行者宜令宰  
臣一員  
撰述 已卯吏部侍郎龍敏改尚書左丞己丑以太子

賓客楊凝式爲禮部尚書致仕詔建錢鑪于樂川丙申  
諫議大夫致仕逍遙先生鄭雲叟卒十二月丁酉朔百  
官不入閣大雪故也已亥故皇子重英妻張氏落髮爲  
尼賜名悟慎并夏臘二十庚戌禮官奏來歲正旦王公  
上壽皇帝舉酒奏玄同之樂再飲奏文同之樂三飲奏  
同前從之歌辭不錄丙辰詔今後城郭村坊不得創造



僧尼院舍丁巳帝謂宰臣曰大雪害民五旬未止京城  
祠廟悉令祈禱了無其驗豈非涼德不儲神休未洽者  
乎因令出薪炭米粟給軍士貧民等壬戌禮官奏正旦  
上壽宮懸歌舞未全且請雜用九部雅樂歌教坊法曲  
從之



舊五代史卷七十八

舊五代史卷七十八攷證

晉書高祖紀四以澶州防禦使張從恩為樞密副使樞密副使原本作樞密使按下文亦作樞密副使今從歐陽史及宋史張從恩傳改正

以版詔徵華山隱者前右拾遺鄭雲叟 右拾遺歐陽史作左拾遺攷是書前後俱作右拾遺今仍其舊

以潞州節度使今後私鑄錢下禁依舊法 案歐陽史

七月丙辰復禁鑄錢是書作七月戊申侯益為徐州

節度使

案宋史侯益傳天福四年晉祖追念虎牢

之功遷武寧軍節度同平章事是書不載同平章事

五代會要所載天福中使相有侯益與宋史同

李自倫義居七世準勅旌表門閭七世歐陽史作六

世又旌表門閭歐陽史作正月與是書作閏七月異

先有鄧州義門王仲昭六代同居案王仲昭歐陽史

作登州人

乙亥詔立唐高祖太宗及莊宗明宗閔帝五廟于洛陽

案立唐廟于西京歐陽史作十二月與是書作十

一月異

訥默庫舊作黏木孤今改

舊五代史卷七十八攷證